

09 OCT 2002

DR MAHATHIR LAWAT BRUNEI JUMAAT INI

KUALA LUMPUR, 9 Okt (Bernama) -- Perdana Menteri Datuk Seri Dr Mahathir Mohamad akan melakukan lawatan tiga hari ke Brunei mulai Jumaat ini.

Lawatannya bersempena Perundingan Tahunan Keenam antara beliau dan Sultan Brunei, Sultan Haji Hassanal Bolkiah.

Tahun ini adalah giliran Brunei menjadi tuan rumah perundingan tahunan itu, demikian menurut kenyataan Wisma Putra di sini, hari ini.

Dr Mahathir, yang akan diiringi isteri Datin Seri Dr Siti Hasmah Mohd Ali dan Menteri Luar Datuk Seri Syed Hamid Albar, turut dijadual mengadakan perbincangan dua hala dengan Sultan Brunei.

Perbincangan itu dijangka tentang isu-isu serantau dan antarabangsa yang membabitkan kepentingan bersama.

Sultan Hassanal Bolkiah akan mengadakan jamuan malam bagi meraikan Dr Mahathir pada hari pertama lawatan itu dan keesokannya, Perdana Menteri dijadualkan beramah mesra dengan masyarakat Malaysia di Brunei pada jamuan tengah hari.

Dr Mahathir dan rombongannya akan pulang ke Malaysia pada Ahad.

-- BERNAMA

HK AHH NAK